

傷寒釋名
病釋名

光緒龍集馬逢祖署
番禺梁于渭題



傷寒論陽明病釋小引

余釋傷寒病獨取陽明或問余曰傷寒六經並重而子獨以陽明爲言何也余曰正以今日之病家獨不聞陽明之治法以致治之有法者直至於無法可治故不得不獨言陽明使人知仲景治陽明之法固至今存也凡傷寒有五而傳入陽明遂成溫病其生其死不過浹辰之間卽日用對病眞方尙恐無及而可藥不中病溷此中焦危急之候乎惟病家不知病在陽明一日而病不減卽是加有加而無減卽不生乃僅視同他病亦可緩緩延之而病卽有不及待者所願病家之於陽明知其治獨急於中焦而生之亦無難也余之從事於

醫者三十年每出療一病歸必紀之於冊以自鏡其所學而於陽明尤加謹焉所用皆仲景方卽不盡然而終不外仲景法以冊稽之曾無一不治之陽明者外可問世內可問心始敢爲此陽明病釋而告於人曰陽明無死證凡勘病必先能治傷寒凡勘傷寒病必先能治陽明苟陽明之能治豈不可推以治六經哉江左下工自記

世補齋醫書 傷寒論陽明病釋

目錄

卷一

陽明經病 釋四十二條

卷二

陽明府病 釋三十六條

卷三

陽明經病 集釋一百四十三條

卷四

陽明府病 集釋一百二十六條附餘論十八條



南京中醫藥大學圖書館版權所

世補齋醫書 傷寒論陽明病釋一

元和陸懋修九芝輯

子潤庠鳳石參校

陽明經病

經爲六經十二經之總稱此則與府對舉之經也故曰經病

陽明之爲病胃家實也

按千金翼於此句胃家實作胃中寒影宋本傷寒論自注云實一作寒

此仲景陽明提綱爲傷寒成溫之候也陽明屬胃故曰胃

家胃家者中焦也實者邪也太陽寒水之邪至此而從陽

明燥化則邪到胃經是爲陽明經病前人乃謂陽明以府

病提綱何也夫旣曰六經之綱自當皆以經言胡獨於陽

明而以府言蓋不知邪之所到卽謂之實而必以堅滿燥

實之當下者方謂之實故實字之不解誤卽自此而起且

陽明不見有經病而經病之清法亦自此廢矣

問曰陽明病外證云何答曰身熱汗自出不惡寒反惡熱也此陽明經病之始也陽明有經府之分外者對裏而言府爲裏則經爲外不言經而言外者所以別於六經之經也身熱汗出爲太陽陽明公共證惟惡熱不惡寒爲陽明所獨寒水之邪當惡寒今不惡寒而惡熱故曰反病旣反則治亦反應用辛涼者不得仍用辛溫矣身熱表熱也惡熱裏熱也其人到此而表裏皆熱也

問曰病有得之一日不發熱而惡寒者何也答曰雖得之一

日惡寒將自罷卽自汗出而惡熱也

千金於發熱上無不字

此言惡寒惡熱爲太陽陽明分際之的然者惟其在太陽時惡寒之甚卽可知其將有大熱而病陽明矣

問曰惡寒何故自罷答曰陽明居中土也萬物所歸無所復傳始雖惡寒二日自止此爲陽明病也

此言惡寒罷而又惡熱則病不從太陽解也自罷謂不曾解肌發表而始之惡寒者至此自不惡寒此可見其欲傳陽明矣土爲萬物所歸無所復傳治苟如法病無不愈此卽陽明無死證之理凡六經病皆當以素問熱病論參看傷寒二三日陽明少陽證不見者爲不傳也

千金作其二陽證不見爲不傳

此言病卽從太陽解而不傳陽明亦不傳少陽也太陽爲

三陽陽明爲二陽少陽爲一陽

傷寒一日太陽受之脈若靜者爲不傳頗欲吐若躁煩脈數急者爲傳也

此言病不從太陽解則必傳陽明也脈數急與太陽脈之浮緩浮緊亦相反一日字不必泥猶曰始初云爾

傷寒三日陽明脈大

此言病在太陽脈雖浮而不大今一日惡寒二日不惡寒三日且惡熱脈又浮中見大則太陽之邪不從少陽樞轉而陽明之病勢已定三日少陽經氣也大卽數急之象經曰足陽明五藏六府之海也其脈大血多氣盛熱壯

本太陽初得病時發其汗汗先出不徹因轉屬陽明也

傷寒發熱無汗嘔不能食而反汗出漈漈然者是轉屬陽明
此皆中陽溜經之病凡勘陽明證首當察其汗如汗出不
通達及始無汗而繼漈然者皆非解病之汗而爲加病之
汗也漈漈汗之微者汗不通達所出又微則陽熱內燔矣
仲景於太陽陽明分際一再言之如此

陽明病脈浮而緊者必潮熱發作有時但浮者必盜汗出
此言脈不緊而但浮則邪猶向外其陽雖盛而衛氣行陰
則陽便得和故曰合卽能有汗名曰盜汗非虛汗也陽明
於日晡所必發熱如潮有信故曰潮此條重在末句脈但

浮爲經病

陽明病法多汗反無汗其身如蟲行皮中狀此以久虛故也此以其人素有寒飲汗又不從元府出而漬於肌膚則邪不自達如蟲在皮中行者不能作汗身必癢也

陽明病脈遲汗出多微惡寒者表未解也可發汗宜桂枝湯此言病雖及胃而尙未離太陽也惡寒爲太陽主證表未解指惡寒一證言就太陽指陽明爲裏就陽明指太陽爲表非謂身有熱爲表未解也陽明之病身無不熱者也因其汗出脈遲而仍惡寒故知爲太陽未罷之桂枝證陽明病脈浮無汗而喘發汗則愈宜麻黃湯

太陽與陽明合病喘而胸滿者不可下宜麻黃湯

此亦病及胃而未離太陽者無汗爲麻黃湯主證喘卽因於無汗若一有汗卽不喘矣因其無汗而喘脈必兼緊亦必惡寒故知爲太陽未罷之麻黃證 凡病有此二證時皆不得早用辛涼

食穀欲嘔屬陽明也吳茱萸湯主之得湯反劇者屬上焦也此言茱萸湯原可治中焦胃寒之嘔而太陽病之甚於上焦者卽防化熱則不是胃寒故得之反劇

若脈浮遲表熱裏寒下利清穀者四逆湯主之

此水寒在胃未成實熱之陽明也邪到胃家必熱而亦有

不即熱者未熱仍爲寒水而水之寒惟附子足以制之陽明病中所謂虛寒虛冷皆指寒水在胃言水者飲也飲即痰也 凡病有此二證時皆不得誤用苦寒

陽明病若能食名中風不能食名中寒

此以能食不能食爲風寒之分初病陽明時宜有此辨別脈浮發熱口乾鼻燥能食者則衄

此言能食爲中風風爲陽邪故口鼻乾燥必動營而致衄

若胃中虛冷其人不能食者飲水則噦

時有以水瀉之灌之等法皆所謂與水也

陽明病不能食攻其熱必噦所以然者胃中虛冷故也以其

人本虛故攻其熱必噦

巢氏病源於條首六字之下再有下之不解其人不能食九字千金同

此言不能食爲中寒冷卽寒水也陽明以有燥屎爲實熱故以無燥屎爲虛冷凡病之宜於攻者必其病之已有實熱者也若無實熱卽爲虛冷其人本虛者謂本無燥屎之實非謂其有當補之虛也但教人以不可攻耳此所謂噦皆是冷噦

陽明病初欲食小便反不利大便自調其人骨節疼翕翕如有熱狀奄然發狂濺然汗出而解者此水不勝穀氣與汗共併脈緊則愈

千金於此條末句作堅者卽愈

此有小小戰汗意奄忽也欲食則穀氣尙能與水敵故水氣不能勝穀而得忽然化汗其時轉以便堅爲幸水負則

土勝矣土宜令勝故戒妄攻

陽明中風口苦咽乾腹滿微喘發熱惡寒脈浮而緊若下之則腹滿小便難也

此亦因中風而病及胃者脾與胃以膜相連腹滿爲太陰主證誤下則太陰脾失轉運之權而少陽三焦亦失決瀆之司

陽明病若中寒不能食小便不利手足澀然汗出此欲作固瘕必大便初鞭後溏所以然者胃中冷水穀不別故也

千金於鞭

字皆作堅固
瘕亦作堅瘕

此則因中寒而病及胃者亦以其病尙屬寒水故水氣與

穀氣不能分別卽不定爲燥屎而但作堅瘕

陽明病脈遲食難用飽飽則微煩頭眩者必小便難此欲作穀疸雖下之腹滿如故所以然者脈遲故也

此言脈遲而不大不數急知其有寒水在胃卽太陽證有未罷也此二條亦戒妄攻 以上皆胃有寒水或太陽陽明合病或太陽證有未罷皆非陽明正病也故宜溫劑不宜寒藥此後則皆傷寒成溫之證矣陽明經病之實者爲火陽明經病之虛者爲水此秘余獨得之

陽明病反無汗而小便利二三日嘔而欬手足厥者必苦頭痛若不嘔不欬手足不厥者頭不痛

陽明病但頭眩不惡寒故能食而欬其人必咽痛若不欬者

咽不痛

此二條千金於條首陽明上皆特出冬字疑上條之反無汗下條之不惡寒既屬陽明應卽謂冬溫病也

此言頭中之病皆水氣上逆而不降也水得熱助則上下

行而寒飲卽化痰熱二三日前水氣向下則小便利二三

日後水氣向上則嘔而欬其咽之痛卽因於欬故不欬則

不痛其頭之痛卽因於熱故不厥則不痛厥謂手足冷厥

則熱不外達不惡寒而反無汗則熱不外越此時裏熱已

甚漸有成溫之勢矣

太陽病發熱而渴不惡寒者爲溫病若發汗已身灼熱者名

曰風溫風溫爲病脈陰陽俱浮自汗出身重多眠睡鼻息必

軒語言難出若被下者小便不利直視失溲若被火者微發

黃色劇則如驚駭時瘧瘵若火薰之一逆尙引日再逆促命

期

時有以火劫發汗燒鍼令其汗等法皆所謂被火也
今之用滋陰藥誤者與水同用辛熱藥誤者與火同

此言風溫病爲辛溫藥所誤故特以渴不惡寒另爲溫病

提綱病在太陽不渴病在太陽必惡寒故渴不惡寒四字

定是陽明主證而下文之昏沈譫妄亦一一皆顯陽明經

證也仲景於溫病一條如是之詳且盡而謂仲景不知春

夏可乎汗下火皆誤所少者清法耳仲景所以不出方者

以清法輕重不一非可泥定一方故也凡人因風病熱卽

是風溫因溼病熱卽是溼溫以證言也冬月病熱卽曰冬